



O Concello de Verín vén de rematar a primeira fase do plan especial de limpeza e desbroce das marxes do río Támega, que abarcou os tramos comprendidos desde a ponte de Pazos ata nova ponte en construción situado en Queizás; e entre a área recreativa de Tintores e a ponte da N-525 ao seu paso por Verín. Acondicionáronse un total de 480.000 metros cadrados de espazo fluvial.

Os traballos efectuados dentro deste plan buscan a mellora da vexetación de ribeira do Río Támega mediante a retirada de árbores mortas do seu leito, retirada de vexetación invasora e desbroce selectivo en ambas as marxes.

Esta primeira fase, que contou cun investimento de 111.492 euros, estivo dividida en tres intervencións: unha primeira que abarcou desde a ponte de Pazos ata nova ponte en execución situado en Queizás, no paraxe de O Pracer; unha segunda na que se acondicionaron os terreos da marxe do río que abranguen desde o camiño de San Lázaro á Preguiza; e unha terceira, recen rematada, na que se realizaron labores de limpeza e desbroce na nova zona verde de A Preguiza, na ribeira verinesa de vilela e en ambas marxes fluviais da área recreativa de Tintores.


«A segunda fase, que será executada a partir setembro, limpará as ribeiras do Támega ata a fronteira con Portugal, dotando a vila de Verín dun extenso e fermoso corredor fluvial», explicou Gerardo Seoane Fidalgo, alcalde de Verín.

Segundo Seoane, o obxectivo principal deste plan é acondicionar os espazos fluviais do río Támega para o seu aproveitamento e goce da cidadanía, sempre preservando as súas funcións ambientais e cauce ecolóxico; «sempre, por suposto, respectando en perfecto estado

a biodiversidade, tanto do propio río como da zona as súas ribeiras».

Seoane tamén quixo recordar que o Concello de Verín conta cos permisos correspondentes dos organismos competentes (Consellería de Medio Ambiente e Confederación Hidrográfica do Douro) para realizar esta actuación.

Ademais, Segundo confirmou o alcalde, o Concello de Verín vén de adquirir, por 20.000 euros, unha superficie de terreo de 20.000 m², que se suma aos 45.000 m² xa existentes da nova zona verde da Pregoiza. «Está proxectado que ao longo deste ano sumemos os 25.000 m² restantes do que será – xunto co de Fontenova- o segundo pulmón verde da nosa vila, cunha extensión total de 90.000 m²».



NOVO PULMÓN VERDE DA PREGOIZA

Segundo confirmou o alcalde de Verín, Gerardo Seoane, o Concello vén de adquirir, por 20.000 euros, unha superficie de terreo de 20.000 m², que se suma aos 45.000 m² xa existentes da nova zona verde da Pregoiza. «Está proxectado que ao longo deste ano sumemos os 25.000 m² restantes do que será – xunto co de Fontenova- o segundo pulmón verde da nosa vila, cunha extensión total de 90.000 m²».

Este actuación forma parte do Plan Integral de Reestruturación e Saneamento de Verín deseñado polo Concello e que está destinado a completar o correcto funcionamento do ciclo da auga do río Támega ao seu paso por vila. O mesmo suporá un investimento total que roldará os 400.000 euros.

Este proxecto divídese en tres grandes actuacións. A primeira, que xa se atopa en marcha, comprende accións de limpeza e desbroce das ribeiras do río Támega; a segunda, estará enfocada a mellorar saneamento hídrico ao seu paso pola zona urbana; e a terceira terá como obxectivo o saneamento nos pobos que conforman o municipio.